

Gawj Bonj Saw Ndeu

贵港市覃塘区蒙公镇古山小学五年级 Hoz Yezbingz/何业萍



“Duz moegyou geijlai yinxdaeuz ha!”
Doeg le bonj saw《Geiq Moegyou Geizraeb》
neix, gou deng Biznozcauz cabheiq caeuq
aengoj majhung de haeujyinx lo.

Aengoj《Geiq Moegyou Geizraeb》miz-
yinx dangqmaz. Ndaw saw gangj moegyou iq
Biznozcauz baenzgoenz gangj vahgyaj, de
vihliux okbae guhcaemz, mbouj haengj bae
hagdangz doegsaw, dawz cienz cawx gobwnj
bae cawx biuq yawj heiq, aenvih gaujluenh
gij yenjucz heiqciengz, de deng lauxbanj
gaemh hwnjdaeuj lo.

Lauxbanj cuengq de okdaeuj le, de youq
ndawbiengz louzlangh, sien bungz daengz
caeggeq, cengdi dai bae, doeklaeng ndaej
dahsien gouq de. De aenvih dam guhcaemz
youh deng vunzvaih yaeuh bae “guk-
fouzyou” guhcaemz geij ndwen, doeklaeng
bienqbaenz duzlawz huk ndeu. De gingvauq
haujlai dwgrengz sinhoj cij deuz ndaej bae
ndaw haij, youh deng duz byasahyiz gyan
roengz dungx bae, saehcingz siengj mbouj
daengz haenx fatseng lo: De gingqyienz youq
ndaw dungx byasahyiz bungzdaengz daxboh,
bohlwg song boux caezsim deuz okbae.
Doeklaeng Biznozcauz bienqbaenz boux
lwgnyez caencingq lauxsaed、maenh’ ak、
gyaez bang vunz ndeu.

Gij ginglig majhung Biznozcauz lwnh
raeuz nyi, cijmiz lauxsaed, bouxwnq cij
caeuq mwngz doxndei. Doeg bonj saw neix
le, caiq siengjsiengj shwgeij, gou roxnyinh
gig ienqhoij.

Geiq ndaej miz baez ndeu, gou caeuq
daegnuengx youq ndaw ranz guhcaemz,
mbouj siujsim deng aencenj doek gwnz dieg
vaih lo. Gou caeuq daegnuengx vaiqviet baet
seuq bae. Daxmeh ma ranz ra mbouj raen
aencenj, cam gou aencenj bae gizlawz, gou
naeuz “mbouj rox”. Daxmeh raen ndaw
doengj nyapnyaj miz meng soiq, gou yousim
“rumzhaenq fwnraq” yaek daeujdaengz,
hoeng daxmeh mbouj fatheiq. Cij dwg
vahnaek cingzlaeg doiq gou naeuz: “Guh
vunz aeu lauxsaed, daj iq couh aeu youq
ndawsim shwgeij ndaem naed ceh lauxsaed
ndeu.” Dangseiz gou lij mbouj rox gij vah
neix dwg maz eiqsei. Seizneix doeg le bonjsaw
《Geiq Moegyou Geizraeb》, gou dauqdaej rox
gij vah daxmeh lo. Gvaqlaeng gou itdingh
mbouj caiq gangj vahgyaj lo, youq gwnz roen
seiqvunz, raeuz aeu guh bouxvunz lauxsaed.

Seizneix gou gawj bonj saw neix hawj
daihgya, daihgya hix daeuj doegdoeg ba.

(boux lauxsae son’ gyauq Liengz
Haijyangz)

suenangq gojlwgnyez

Geiq “Vabienqsaek” Majhung

Ndaw gyang ndoengfaex miz duz cinglingzva
ndeu, coh de heuh “vabienqsaek”.

Vabienqsaek daengx ndang hausagsag, cijmiz
byoemgyaeuj dwg saekhenjgim, lumj riengz haeux-
henj nei. De daenj buhrog hausag ronghcingx, gwnz
buhrog miz gak cungj doz va nywj, gij saek de vava
loegloeg. Ceiq saenzgeiz dwg gwnz rwz de cab miz
diuz bwnroeg bienqsaek caet cungj saek ndeu,
cijaeu yungh gaiq bwn neix diemjdiemj, doxgaiq
deng de bungq deng haenx couh bienqbaenz gij saek
de siengj aeu haenx. Gaiq bwn bienqsaek neix ndaej
doenggvaq sou gij saek daswyenz, sawj sezswd
vabienqsaek engq ak lo.

Seizcin, vabienqsaek aeu seizcin bienqbaenz
saekhou; seizzah, vabienqsaek youh aeu va’ngaex
bienqbaenz saekhou; seizcou, gak cungj haeuxgwn
demsou haenx hix deng bienqbaenz saekhou lo……
Youq ndawj gij geiqciet deng de senj deng haenx,
cijaeu doxgaiq miz saek, cungj deng bienqbaenz
saekhou. Yienghneix, sezswd vabienqsaek hix
ngoenz beij ngoenz ak lo.

Gyoengqvunz caeuq gyoengq doenghduz youq
ndaw ndoeng youq haenx, cungj mbouj gyaed duz
cinglingzva bienqsaek neix, aenvih de cungj dwg
hawj daihgya gvaq seizdoeng, cawzle saekhou
nitcengx, gijmaz saek cungj mbouj miz, lienz
daengngoenz cungj mbouj dwg ndinghoengz lo.
Gyoengqvunz nit ndaej ndoj youq ndaw ranz,
gyoengq doenghduz hix ngoenzngoenz suk youq
ndaw rongz. Doiq gijneix, vabienqsaek gig daekciq:
Sou yawjyawj, gou geijlai miz bonjsaeh ha, dawz
daengx biengz cungj bienqbaenz saekhou, ak lai bw!

Vabienqsaek daekciq dwk fwngz foux din diuq, boux
dog youq ndaw ndoeng mbin bae mbin dauq.

Hoeng menhmenh dwk, vabienqsaek mumj-
gyumq roxnyinh daengz gagdog lo—— mbouj miz
vunz swt de, de hix yied daeuj yied roxnyinh daengz
cungj saedceij neix mbouj miz gijmaz eiqsei.

Vabienqsaek roebdaengz buz geq cingq gip
fwnz he, de cam: “Daxbuz, vihmaz daihgya cungj
mbouj swt gou ne?” Buzgeq riumbwng naeuz:
“Aenvih mwngz dawz sojmiz saek cungj bienq
hau lo, hawj gwndaenj dou gig mbouj fueng-
bienh……” “Yienghneix baenzlawz cij ndaej hawj
daihgya maij gou ne?” Vabienqsaek gip dwk cam.
Daxbuz han naeuz: “Cijaeu mwngz dawz sojmiz
saek boiz hawj daswyenz couh ndaej lo, gij saek neix
cungj dwg gvi daihgya.” Vabienqsaek itseiz mbouj
rox gangj gijmaz lo, caem yaep ndeu le naeuz:
“Gyo’mbaiq mwngz!”

Seizdoeng gvaqbae seizcin daeujdaengz,
vabienqsaek cingjcingj naemj aen seizdoeng
ndeu—— de yaek dawz gij saek gyaundeij cungj
boiz hawj daihgya: De byaij daengz henz gofaex
hung, aeu gaiqbwn gwnz rwz yaengyaeng diemj
mbat ndeu, ndoengfaex sikhaek bienq lumj
doenghbaez heuyau lo; de youh daeujdaengz henz
suenva, aeu gaiqbwn yaeng’ yaeng bungq mbat he,
gak saek va dauqcungz hai lo, saek de ndei yawj
dangqmaz; de youh mbin daengz suenmak, dawz
gaiqbwn yaeng’ yaeng fid mbat ndeu, gomak sikhaek
did ngaz、hai va…… vabienqsaek dawz gij saek
cungj boiz hawj daihgya caez lo. Gyoengqvunz okdou



fwdfwd haenx cungj riunyumj coh de, miz mbangj lij
bekfwngz haenx de. Vabienqsaek gamjsouh daengz
raeujrub caeuq angqyangz de caengz gamjsouh
daengz gvaq haenx: Roegvenz cawjdoengh gvaqdaej
dongx de, gyoengq lwgnyez cungj buet gvaqdaej
siengj caeuq de guhcaemz; buzgeq dawz ceiz caet
cungj saek caenfwnz guh haenx soengq hawj
vabienqsaek ……

Vabienqsaek angq lai lo, de daj neix caiq hix
mbouj soucomz saek lo, aenvih de rox aen dauhleix
ndeu: Sezswd ak lai cix mbouj ndaej sawj de
angqyangz, hawj daihgya angq cij dwg caencingq
angqyangz.

(roek nienzgaep Muyungz Cunghyuij)